



Fasnacht 2020

## Vereinigte Kleinbasler 1884 Binggis

### Dr Summer isch haiss, dr Rhy isch voll

In unserer Schuel lehre mir vyyl über s Klima  
Unsere Lehrer findet das total prima  
Au lehre mir dr Wärt vom Wasser schetze  
Und dass mir drby au d Natur nit verletze  
S grööschte Gwässer bi uns wie ka s anderscht sy  
Isch bi uns nadürlig unsere schöne Rhy  
Dört kasch ganz gmietlig uff d Fähri sitze  
Und kunnsch drby denn doch ins Schwitze  
Machschrno e Sprung ins Nass  
Do hänn vor allem mir Kinder vyl Spass

Isch s im Summer haiss mueschs begryffe  
Gohsch lieber in Rhy als in Käller go pfyffe  
Au wenn dr Pfyfferlehrer uns möcht schlyffe  
Muess au är das halt begryffe  
De meriggsch es vor allem au bim Sitze  
Dass me vermehrt am Gsäss duet schwitze  
Dr Schwaiss lauft aabe durch alli Ritze  
Do hilfts au nit, d Ärmel hintere z litze

S haisse Wätter duet alli an Rhy aane logge  
Sogar die Griene mit handgschtriggde Sogge  
Wo nit nur am Rhybord uff em Diechli hogge  
Und e Sprung in Rhy dien wooge – mitsamt ihre Sogge

Au dr Stroofzeddel-Sheriff vo dr Patroullie Vier  
Verlosst für e knapp halb Stündli sy Revier  
Entledigt sich rasch synere Uniform  
Und freut sich uff e Rhyschwumm ganz enorm  
Kurz druff aabe sinns denn plötzlich drey  
S kömme no zwai drzue vo dr Kriminalbolizey  
E bitz spöoter denn bi dr Wettstaibrugg  
Göhn die drey wider uff ihre Boschte zrugge

D Lehrere vom Schuelhuus Brunnmatt  
Findet die Idee mit em Rhy no glatt  
Isch s im Summer nämmlig haiss  
Mache d Schieler sowyso nur Schaiss  
Drum maint sy: «Kinder mr löhn d Schuel jetzt sy,  
und rysse zämme e Schwumm im Rhy»

Dr Luigi macht schlapp bim Stroossebau  
Schwitzt vor sich aane, wie alli andere au  
«Goffedelli, so kasche nite schaffa,  
muesche gar nite so schtupidelli do aane gaffa»  
Är schnappt sich kurz dr Wiggelfisch  
Und zäpft an Rhy was hesch was gisch

Und au die diggi Dante Emma  
Isch jetzt grad im ene Dilemma  
Sy möcht am liebschte au in Rhy  
Nur kunnt sy nümm in Schwümmring dry  
Ych würd do saage, nach mym ermässe  
Hett die doch aifach vyl z vyl Torte gässe

Au d Mamme sait zue uns am Mittagsdisch  
«Kumm, nämmet alli dr Wiggelfisch  
Über e Mittag göhn mr in Rhy als neuschte Gäg  
Und zum z Midaag gitte e Börger vom Mäc»

Voller Freud kunnt au dr Babbe  
Mit aabetrampete Badeschlabbe  
Und sym glaine Wohlstandsranze  
Gmuetlig an Rhy aabe z danze  
Vo wytem rieft är wiene Dier:  
«An dr Buvette gitte denn e grosses Bier»  
und spöoter denn im Klingeli Revier,  
länggts grad nomoll für zwai, drey, vier  
Är maint das syg denn bsunders toll  
Am Änd isch nit nur dr Rhy, sondern au dr Babbe voll

Uffgereggt rieft dr Babbe wiene Geier  
«He lueget, do schwümmt d Familie Meier»  
Au die hänn mit Sagg und Pagg  
Ihri Däsche gfüllt, in dr ainte no e Dudelsagg  
«He jo, für die alte Gyzknäbberkrääge  
Isch s Schwümme im Rhy e groosse Sääge»  
Das duet e so vor allem guet klappe  
Für Lüt mit eme Budget, emene knappe  
Will in Rhy ka praggtisch jeede gumpe  
Do bruchsch kai Stutz und muesch nüt pumpe  
Bi dr Klingeli Buvette hett d Familie Meier mieh  
Sy mien dr Herr Meier erschöpft uss em Wasser zieh  
D Frau Meier isch usser sich vor Stuune  
Und dr Herr Meier macht ain uff schlächti Luune  
«Hänn sy ghört? Das isch doch dr Hammer  
Was in däm Rhy alles ummefahrt – e Jammer»

Dr Babbe schüttlet dr Kopf mit sym Gnigg  
E so Blödsinn stoht sicher nur im Bligg  
Dr Meier luegt en aa mit Auge ganz groosse  
«Jä nai, jetzt mien sy gnauer aaneloose»

Unter anderem isch es jo scho länger bekannt  
Im Rhy findsch au Velo, Schueh und allerhand  
Bim Schwümme im Rhy gitte allerdings au Sache  
Wo me sich ärschthafft Gedangge sött mache  
Me haig im Rhy schynts – nit emoll so wyt unde  
Tonnewys Chemikalie aller Art dört gfunde  
Wo durch Huushalt und au vo dr Industrie  
So ainiges ändet in unserem schöne Rhy  
Vo Löösigmittel und Medikamänt  
Creme für dr Körper und au für d Händ  
Vo Kontraschtmittel, wo me für s Röntge verwändet  
Kai Wunder, dass e so jeede Fisch verändert  
Künschtligi Siessstoff und Roschtschutzmittel  
Und zwüscheduure schwümmt en alte Kittel  
Mit Herbizid und Fungizid  
Also mir goht das jetzt langsam z wyt  
Die grossi Froog isch drum zum Gruuse  
Wie griegsch dä Misch au wider zum Wasser uuse  
Will unseri Kläralage das schynts nit kenne  
Sy dien also nit nur in dr Regierig penne  
S Fazit finde gar nit alli wirgigg toll  
Unsere Rhy isch mit vyl schädliche Sache voll  
Do hätt jetzt s Greta vo Schwede wider öbbis z saage  
Aber glaub mr, Gretli, das ligt au uns uff em Maage

Dr Babbe sitzt no immer am Bier mit syne Schlabbe  
Und maint mit eme Satz – emene knappe  
«Jo super, jetzt goht mr e Liecht uff, ojee  
Gohsch in Rhy, bruchsch kai Nachttischlämpli meh  
Mit so vyl Chemie am Ranze, hösch  
Lüchtisch die halbi Nacht uss dynere Wösch»  
Är findet die Situation syg allerhand  
D Lüt maine du haigsch e Sunnebrand  
Drby hesch en Ussschlaag e roote  
Kunnt das äggschd vo de Fisch, dääne doote?  
Em Babbe wird s jetzt langsam z bunt  
Wär weiss wie das no uuse kunnt  
Dass är sich nit no meh muess schämme  
Paggt är sy ganze Grümpel zämme  
Dä Rhy syg ihm jetzt ainerlai  
«Salli zämme, ych gang jetzt hai»

Und d Moral vo dääre Gschicht  
Me liist jo täglich soonigi Bricht  
Wo me z vyl Plastigg duet beklage  
Drby muess me do jetzt saage  
Es brichtet kaine vo dääre Chemie  
Wo ummeschwümmt in unserem Rhy  
Mir Binggis finde s gar nit toll  
Will dr Rhy isch ebbe nit nur im Summer voll

**D Ladäärnen-Uusstellig uff em Minschterplatz und d Waagen- und d Reggwisyten-Uusstellig bi dr Kasäerne sin vom Määntig znacht bis am Mittwoch demorge. Deert und an de 3 Verkaufsständ in dr Stadt ka me au alli Zeedel und Schnitzelbängg, d Blaggedde und dr Rädäbängg kaufe.**

**D Zeedel-Läesede isch am Sunntig no dr Fasnacht, vom Firfif bis am Siibeni zoobe in dr Baseldytsche Bihni im Lohnhof. Dr Yydritt isch ver-gäabe.**

**Buebe und Maitli kenne ab em 7. Altersjohr in dr Pfyffer- und Drummel-schuel vo dr VKB gratis e halb Johr go schnubbere.**

Yschryybe kasch di im VKB-Käller an dr Clarastrooss 57, im 2. UG am Määntig, 09. Meerz 2020 vom Säggis bis am Achti zoobe.

Meh Informatioone lääse und Aamäldige abschigge ka me unter:

**www.vkb.ch bzw. jungi@vkb.ch**